

Dia 14 di october na Biblioteca Nacional Oranjestad lo tuma lugar

Tertulia Literario "Por Amor" organisa pa sra. Maruja Forero Manriques



ORANJESTAD - Tur aña directora di e Coro La Escala sra. Maruja Forero, ta organisa un actividad cultural na Biblioteca Nacional Oranjestad.

Sra. Forero a declara na Bon Dia Aruba cu e aña aki su tertulia literario lo carga e nomber: "Por Amor...", y e lo

tuma lugar dia 14 di october proximo den e mesun lugar di semper.

Pakico "Por Amor"? El a splica cu generalmente e ta bautisa su tertulia cu un nomber cu tin hopi contenido y nificacion den dje. Ya den pasado el a yega di bautisa su tertulia bou e titulonnan di

"Hermanidad", "Sin Fronteras", "Remembranza", etc...

"Pakico pa amor, pasobra pa amor mi ta haci e tipo di actividad aki. Pa amor na mi prohimo cu ta mescos cu ta stima Dios, mi ta haci e cosnan aki", asina sra. Forero a bisa.

MAS STIMULO PA PROMOVE CULTURA

Directora di Coro La Escala y grupo Tertulia Literario "Aruba Nueva", sra. Forero ta bisa cu generalmente un tipo di actividad cultural asina cu ta demanda hopi esfuerzo, sacrificio y gasto, mester tin un apoyo financiero di un instancia gubernamental. Ora cu e ta bisa instancia gubernamental, e no ta referi particularmente na e gobierno di Aruba, sino na e gobierno di cualkier pais, pasobra e tipo di actividad aki ta un regalo cultural pa e hendenan cu ta aprecia nan.

Pesei ta importante pa gobierno por sostene un actividad asina, ya cu e ta forma parti di e promocion di actividad cultural, y di extension cultural di un pais. E ta haya cu ta importante pa persona cu ta realiza un tipo di actividad asina mester haya un bon pago, ademas di insentiva y motiva nan, pa nan por sigui cu e trabou cultural aki. E tertulia literario aki a bira un compromiso anual cu ta tumando lugar keto bai for di 1987.

PROGRAMA YAMATIVO Y VARIA

E ta splica cu e programa e aña aki, manera tur aña, e ta uno hopi varia. Y e mester ta un programa hopi varia, ya cu e publico cu normalmente ta asisti tur aña na e tertulia literario, ta custumbra di disfruta un programa cultural cu un gran variedad tanto di poesianan, como di musica folklórico, combina tambe cu actuacion.

E ta spera cu e aña aki, e

lo conta cu asistencia di e mesun hende cu tur aña ta asisti pa disfruta sanamente di e actividad cultural aki. Aunke Tertulia Literario "Aruba Nueva" 2006 a ser bautisa cu e nomber di "Por Amor", e no ta wordo destina unico y exclusivamente na e sentimento puro aki.

Sra. Maruja Forero a declara na Bon Dia Aruba cu e palabra "amor" tin un nificacion profundo, y ora cu e ta papia di amor, den e caso aki e ta papia di e amor cu e ta sinti pa su amistadnan, e amor cu e ta sinti pa su trabou, e amor di un trahado pa su trabou, e stimacion di un doño di trabou pa su personal... "Amor mester t'ei pa tur loke nos ta haci, si no tin amor no tin nada", asina sabiamente sra. Forero ta declara na Bon Dia Aruba.

Aunke e ta un amor universal, sra. Forero a traha un potpuri musical dedica na e amor entre pareha. E ta un potpuri masha bunita, pero dificil pa trece dilanti, asina el a manifesta. "E ta un potpuri musical bunita, e canticanan no ta di mi, pero e mescla ta di mi mes", asina sra. Forero a bisa.

Den cuadro di e presentacion aki Maruja Forero lo haci e debut di un cantica cu el a composita dedica na Señor. Tambe nan lo bini cu un obra riba escenario cu un mensahe hopi profundo riba con nos mester compromete nos mes pa busca un solucion na e problematicanan cu ta afecta nos comunidad. Nos ta desea sra. Maruja Forero Manriquez hopi exito den su actividad cultural.